

Per ina entrada da basa nuncundiziunada

Votaziun dal pievel ils 5 da zercladur 2016

DA LUCAS DEPLAZES / ANR

■ **Ils 5 da zercladur proxim sto il pievel svizzer er prender posiziun davart l'iniziativa «Per ina entrada da basa nuncundiziunada». Il cussegl federal ed il parlament recumondan da refusar l'iniziativa. Alain Berset ha preschentà la posiziun da la regenza.** En Svizra vala fin uss il princip che persunas ch'èn ablas da lavurar finanzieschan sezzas lur vita, e quai cun prestar ina lavur tenor lur savair e pudair. N'è ina persuna betg abla da lavurar e da gudar per segirar sia existenza vegn la cuminanza en agid cun diversas prestaziuns socialas. La finanziaziun da las assicuranzas socialas è reglada cleramain e vegn adattada als vairs basegns.

Ina midada fundamentala

L'iniziativa pretenda ina midada fundamentala da quest princip. Ella vul cumpletter la Constituziun federala cun l'incumbensa che la confederaziun introduceschia ina entrada da basa senza cundiziuns. Uschia pajass il stadi als umans sur 18 onns che vivan en Svizra ina renta. Ils iniziants discurran d'ina renta da 2500 francs il mais. Per uffants è previs in supplement da 625 francs. Ils exponents da l'iniziativa fan attent a las midadas enormas sin il sector da lavur e vulan provotgar ina discussiun davart la repartiziun e l'indemnisaziun da la lavur en l'avvegnir. Finamira saja da garantir a mintgin ina vita en dignitad.



L'iniziativa che vegn il zercladur en votaziun pretenda ina paja minimala per tuts e quai senza cundiziuns.

KEYSTONE

Privel per nossas ovras socialas

Segirar a mintg'in ina vita en dignitad, quai è ina finamira gia fixada en la Constituziun federala. Il cussegl federal s'engascha per realisar questa incumbensa, ha confermà cusseglier federal *Alain Berset* venderdi passà a las medias. Il cussegl federal renconuscha la muntada da las

ponderaziuns davart la lavur e las consequenzas per l'avvegnir en connex cun la tecnisaziun e la digitalisaziun. Quai han ils iniziants cuntanschì. Er il cussegl federal accumpogna quest svilup cun atenziun. L'iniziativa saja dentant la schliaziun fallada, cumbinada cun in grond ristg per la cuminanza. Ina renta

per mintgin senza cundiziuns muntass in privel per noss success economic e pericolitass las prestaziuns socialas da la Svizra. Cun mesiras definidas sustegna noss sistem social persunas dependentas d'agid. Noss sistem social cuntegna er ina cumponenta da solidaritad ed ha ina rolla d'integraziun sociala. Cun ina entrada

da basa nuncundiziunada retschavess pia l'entira populaziun in sustegn finanziel senza avair prestà insatge per la communitad. In tal sistem offendess il sentiment da la populaziun per giustia, pericolitass il spiert da cuminanza e qua tras la coesiun naziunala, ha accentuà Berset.

Consequenzas negativas per l'economia

Ina renta nuncundiziunada per mintgin na pudess betg remplazzar nossas ovras socialas. Fissan vinavant necessarias prestaziuns supplementaras per diversas situaziuns persunalas. Averta resta la dumonda centrala da la finanziaziun. Las expensas per ina tala renta vegnan calculadas sin var 208 milliardas francs l'onn. Bain pudess ina gronda part vegnir finanziaza cun las ovras socialas existentas e cun in transfer da las entradas da basa. Il cussegl federal quinta cun in manco da finanziaziun da 25 milliardas francs. Quai che stuess vegnir cumpensà u cun ina considerabla reducziun da las prestaziuns dal stadi u cun in augment massiv da la taglia sin la plivalita da var 8%, pia il dubel da l'actuala taglia. Berset ha er fatg attent a las consequenzas negativas per l'economia e per la segirtad sociala. Ina renta senza prestaziun da lavur prendess a bleras gruppas da persunas la motivaziun da lavurar e da gudar e muntass in grond impediment per l'integraziun da persunas cun ina furmaziun grashla, da persunas che lavuran a temp parzial, quai che pertutga principalmain da las dunnas.